



Mpanzi wa Kimbingu

Akawaambia mambo mengi kwa mifano, akisema, Tazama, mpanzi alitoka kwenda kupanda.—**Mathayo 13:3.**

Kwenye eneo la Mashariki, hali ilikuwa ngumu sana, na kulikuwa na hatari kubwa kutokana na vurugu, kiasi kwamba watu walikuwa wakiishi hasa katika miji yenye kuta, na wakulima walitoka kila siku kufanya kazi nje ya kuta. Hivyo Kristo, Mpanzi wa kimbingu, alitoka kwenda kupanda mbegu. Aliiacha nyumba yake ya usalama na amani, aliacha utukufu aliokuwa nao pamoja na Baba kabla ya ulimwengu kuwa, aliacha nafasi yake kwenye kiti cha enzi cha ulimwengu. Alisonga mbele, mtu mwenye mateso na majaribu; alikwenda kwa upweke, kupanda kwa machozi, kutia maji kwa damu yake, mbegu za maisha kwa ulimwengu uliopotea.

Watumishi Wake kwa namna hiyo hiyo wanapaswa watoke kwenda kupanda mbegu. Wakati alipoitwa kuwa mpanzi wa mbegu ya ukweli, Ibrahimu aliagizwa, “Toka wewe katika nchi yako, na jamaa zako, na nyumba ya baba yako, uende mpaka nchi nitakayokuonyesha” (Mwanzo 12:1). “Akatoka asijue aendako” (Waebrania 11:8)... Katika jasho na machozi, kwa upweke, na kwa dhabihu, mbegu lazima ipandwe.

“Mpanzi huyo hulipanda neno.” Kristo alikuja kupanda ulimwengu kwa ukweli. Tangu mwanadamu aanguke dhambini, Shetani amekuwa akipanda mbegu za uovu. Ni kwa njia ya uongo aliweza kuanza kudhibiti wanadamu, na hivyo anaendelea kufanya kazi ya kupindua ufalme wa Mungu duniani na kuwaleta watu chini ya mamlaka yake. Mpanzi wa mbegu kutoka ulimwengu ulio juu, Kristo alikuja kupanda mbegu za ukweli. Yeye ambaye alikuwa amesimama katika mikutano ya Mungu, ambaye aliishi katika patakatifu pa milele, ndiye ambaye angeweza kuja na kuwaletea watu kanuni safi za ukweli. Tangu Kuanguka kwa mwanadamu, Kristo alikuwa mfunuaji wa ukweli kwa ulimwengu. Kupitia Kwake mbegu isiyoharibika, “neno la Mungu lenye uzima, lidumulo hata milele,” linawasilishwa kwa wanadamu (1 Petro 1:23). Katika ile ahadi ya kwanza iliyonenwa kwa kizazi chetu kilichoanguka dhambini katika Edeni, Kristo alikuwa akipanda mbegu ya injili. Lakini mfano huu wa mpanzi unahusu hasa huduma Yake binafsi kati ya watu na kazi aliyoianzisha.

Neno la Mungu ndiyo mbegu. Kila mbegu ndani yake ina kanuni ya kuota. Ndani yake maisha ya mmea yamejificha. Hivyo kuna maisha katika neno la Mungu. Kristo anasema, “Maneno hayo niliyowaambia ni roho, tena ni uzima” (Yohana 6:63)... Katika kila amri na katika kila ahadi ya neno la Mungu kuna nguvu, maisha halisi ya Mungu, ambayo kupitia amri inaweza kutekelezwa na ahadi kutimia. Yeye anayelipokea neno kwa imani, anapokea maisha na tabia yenyewe ya Mungu.

Kila mbegu inatoa matunda kulingana na aina yake. Panda mbegu katika mazingira sahihi, nayo itaendelea uhai wake yenyewe katika mmea. Pokea ndani ya nafsi kwa imani mbegu isiyoharibika ya neno, nayo itazalisha tabia na maisha kulingana na mfano wa tabia na maisha ya Mungu (Christ's Object Lessons, 36-38).